
Poruka rektora Univerziteta u Sarajevu prof. dr. Tarika Zaimovića povodom početka akademske 2024/2025. godine

Uvaženi profesori i profesorice, poštovane kolegice i kolege, zaposlenice i zaposlenici, drage studentice i studenti Univerziteta u Sarajevu,

početak još jedne akademske godine je trenutak koji uvijek sa sobom nosi posebnu simboliku, ne samo kao početak novog ciklusa prenošenja i razvoja znanja, već i kao jedinstvena prilika za svakog od nas da se sa novom energijom posvetimo razvoju, učenju i istraživanju.

Univerzitet u Sarajevu ove godine obilježava 75 godina postojanja i nepokolebljivo nastavlja svoju misiju obrazovanja i stvaranja budućih lidera, inovatora i stručnjaka koji će oblikovati društvo u kojem živimo. Naš univerzitet, koji je decenijama predvodnik naučnih i istraživačkih postignuća Bosne i Hercegovine, snažno je opredijeljen da svoju budućnost gradi na temelju izvrsnosti i inovacija.

Ova akademska godina donosi nove izazove, ali i brojne prilike za napredak. Naš prioritet ostaju studenti, njihov akademski uspjeh i razvoj, kako na profesionalnom, tako i na osobnom planu. Kao institucija, nastavit ćemo s unapređenjem nastavnog procesa, jačanjem infrastrukture i podsticanjem interdisciplinarnog pristupa u učenju i istraživanju. Zajedno s profesorima i istraživačima, nastavljamo razvijati našu naučnu i umjetničku izvrsnost. Nova akademska godina nudi nam priliku da preispitamo naše pristupe, prilagodimo ih potrebama savremenog svijeta i zajednički stvorimo okruženje u kojem će se svi osjećati motivirani da doprinesu zajedničkoj misiji Univerziteta.

Drage studentice i studenti, vaša odgovornost nije samo da stičete znanje, već da ga aktivno primjenjujete, širite i dijelite. Budite posvećeni svojim akademskim obavezama, ali i otvoreni za usvajanje i istraživanje novih ideja i pristupa. Budite radoznali, kritični, ali i odgovorni u svom akademskom radu. Uz to, vi ste ambasadori ovog univerziteta, i važno je da kroz svoje ponašanje, rad i učešće u društvu, promovirate vrijednosti kojima se Univerzitet vodi – znanje, integritet, inovativnost, mir, pravda, društvena odgovornost i inkluzija.

Poštovane profesorice i profesori, istraživačice i istraživači, naša posvećenost obrazovnom i naučnom radu ključna je za unapređenje kvaliteta nastavnog procesa i istraživačkih rezultata. Budimo inspiracija našim studentima, pružajući im ne samo informacije, već i motivaciju za kritičko razmišljanje i inovativan pristup. Osim toga, više nego ikada ranije potrudimo sa da naš naučnoistraživački rad usmjerimo ka rješavanju ključnih problema našeg društva, donoseći rješenja koja će unaprijediti kvalitet života i doprinijeti društvenom blagostanju.

Poštovane zaposlenice i zaposlenici, vaša podrška svakodnevnim aktivnostima Univerziteta je neophodna za njegov uspjeh. Efikasno funkcionisanje svih segmenata Univerziteta, od administracije do tehničke podrške, direktno doprinosi stvaranju poticajnog okruženja za učenje, istraživanje i inovacije. Vaš rad čini Univerzitet mjestom koje podstiče izvrsnost, a vaša predanost i profesionalizam ključni su za naš zajednički uspjeh.

Univerzitet u Sarajevu, kao najznačajnija akademska institucija u Bosni i Hercegovini, ima posebnu odgovornost u očuvanju i unapređenju univerzitetske slobode i autonomije. Ove vrijednosti su temelj našeg rada, jer samo uz punu akademsku slobodu i institucionalnu autonomiju možemo ostvariti svoju misiju. Kao *alma mater* svih javnih univerziteta u našoj zemlji, ne smijemo dopustiti da se naša autonomija kompromituje kratkoročnim interesima ili vanjskim pritiscima. Akademska sloboda omogućava naučnicama i naučnicima, profesoricama i profesorima, studenticama i studentima da istražuju, kritički razmišljaju i izražavaju se bez straha od političkog ili finansijskog uplitanja. To je sloboda koja nam omogućava da napredujemo i inoviramo.

U ovom vremenu, kada se suočavamo s globalnim izazovima kao što su demografske promjene, klimatske krize, tehnološki razvoj i socioekonomska nejednakost, univerziteti moraju preuzeti aktivnu ulogu u oblikovanju društva. To možemo postići samo uz očuvanje naše autonomije, kao garanta kvaliteta, integriteta i kritičke misli. Očuvanje autonomije nije samo institucionalna borba, već i naša zajednička misija – misija svih nas koji činimo Univerzitet u Sarajevu. Uvjeren sam da ćemo zajedničkim snagama nastaviti jačati Univerzitet u Sarajevu kao centralnu obrazovnu i istraživačku instituciju naše zemlje.

Scientia potentia est.

Sarajevo, 07. 10. 2024.